

Слово Спиридона Потемкина.
О кресте Господа нашего Иисуса Христа;
и о крузе его яже предаша святии апостоли Божии церквам;
и о Агнице непорочном Христе; и о Петрове кресте;
и отступникове знамени, вся яже объявлена будет на дни сия.

Понеже нужно рещи о истинной жертве и жребии, пренепорочнаго Агнца Христа, яже истинная и пренепорочная кровь Его, и тело от истиннаго и животворящаго креста Его. яко питавшася вси апостоли, и вси святии, иже богоугодно и праведно пожившии, после волнаго Его распятия яже на кресте, и по тридневном Его еже из мертвых воскресении, и по вознесении на небеса, яже послав от Отца Дух Святыи, и теми утвердивый всю вселенную, и проповедавый вся концы евангелием царствие свое, и запечатлевый все мира концы. седмию вселенскими соборы, и святыми отцы и преподобными, и всеми святыми, истинне вся преданная ими. Наипаче же Господу везде строящу, и слово исполняющу и чудодействующу. пять тысящ мужей препитав пятию хлебы, и от толика народа два десять кошниц оставльшеся. яже прообразова Мелхиседек царь Салимский, изнесе Аврааму семь хлебов, и от четырех стихий сотвореннаго Адама. И приточник глаголя, Премудрость созда себе храм, и утверди столп седмь, и закла своя рабы, сиречь жертвеная, и черпа в чаши своей вино, и уготова свою трапезу, седмочислием. Темже образом седмь просфир, во образ седми небес, и седмь веков, и седми церквей, и седми таин церковных, и седми звезд, и седми светилников, и седми вселенских соборов, и седми дней. Поистинне приносится в церкви хлеб не прост, носит бо на себе знамение великаго Бога, яко престол царский, место Его свято, на немже пречистое стояние, имущее со страстьми изображено сицево [Изображен Голгофский четырехчастный крест с полной символикой в круге с надписанием по кругу: «Се Агнец Божий вземляй всего мира грехи»].

Сиче о святем крузе пишет святыи Дионисий Ареопагитский: якоже бо круг не имат начала ни конца, такоже и Бог. Того ради глаголет Василий Великий, прежде приношения подобает в церкви приносить хлеб крестом животворящим знаменан, с непостижимом кругом, и в нем святыи и непорочный Агнец. О немже толкуя глаголет Иоанн Златоустый на Благовестие Иоанна Богослова. Агнец бо есть Слово Божие, ядуша от главы и до ног. глава убо Божество, се воистину глава. нозе же плоть, се последнее. И паки о крузе, ибо на святых иконах пресвятыя Богородицы на главе, и у всех святых. пишется кругом сим являет венец нетления, яко раби суть непостижимаго Бога. То кольми паче о святей жертве разумети тайную трапезу Христову, о нейже апостолу вопиющу, да скажется церковию соборною и апостольскою. Юже такую тайну Иисус Христос Сын Божий положи на земли. ейже первее служитель и апостол Ияков брат Божий, святей Божии и непорочней службе, яже самом Господем научим бе во Иеросалиме, по воскресении Его из мертвых, и иже по вознесении Его на небеса. Первии служители бысть апостоли и проповедницы, и утвердители всем Божиим тайнам, и всем Божиим церквам соединители, яко столпи неборимии и неподвижимии, и непоколебимии, предателие божественнии апостоли, и вси иже богоугодно пожившии святителии, и преподобнии отцы, иже упасше и соблюдающе веру нашу непоколебиму и неподвижиму, и непревратну, и нерушиму, и блюстителну, и незорну, и соединителну веру нашу истинную христианскую. Якоже запечатленную святыми вселенскими седмию соборы. Такожде и церковь Божию блюстителну соблюдше непревратну и непреложну и соединену, Святым и животворящим Духом укреплену, яже предавше самовидцы Слову Божию, наставницы и учителяе, и предателие тайнам Божиим. Яже на спасение роду христианскому, предавше блюстителну от рода в род века сего, и сохранену от запинателя рода христианскаго, и душегубителя антихриста, и гонителя и мучителя. И яже напоследок в последние роды збывшася, и ныне явственне суща гонителей и мучителей, а не учителей истинне, и апостольстей церкви, и вере христианской, яже истинне свидетельствует святая соборная и апостольская церковь, и их предания, яже в предателних книгах, вся явственне объявлена подробну, и укреплена святыми вселенскими соборы.

А ныне братие поразумейте збывшееся в роде нашем, что ниже слышахом, ниже видехом яже творимая и принуждаемая, и яже мучащая Христавых ради таинств, и Сына Божия, и поклоняния иконнаго, сиречь креста шепотнаго. О, братие, откуда неначаемая беда и погибель взыде к нам, и потопляя нас. ово ласканием и учением неким, и принуждением, наипаче же мучением. Откуда буря зелная найде на нас, и потопляя нас, и повевая на нас ветром неприятным. И како ныне вера наша истинная апостольская и соборная церковь стала превратна, и преложна и подвижна и колеблема, и несодинена и не единствена, и не сохранена и не блюстителна. Такоже и крест Христов, яже писание свидетельствует в божественных книга, и крестные каноны явственне. крест животворящий светлее солнца осияя вси земнии концы, и досязая до небес, и прогоняя лукавия духи. Сие великое знамение честнаго и животворящаго креста Господня, и тела Христова, сиречь Агнца Божия вземлющаго всего мира грехи. И о подножии креста Христова, подножие на враги, тому кланяться подобает. И пишеть о том подножии в крестном каноне в седмой песни. Сила непобедимая, Христово подножие, победительство на враги. Что ино подножие враги побеждает, аще не сила святаго и спасеннаго креста Христова. Тому слава веки веком, Аминь.

О кресте святаго славнаго и верховнаго апостола Петра, подобает ведати [Изображен перевернутый трехчастный крест с нижней колодою в круге]. Сей крест святаго апостола Петра, в честь и в память от древних лет. Токмо на церквах имяху. Того ради святыи Петр моли Нерона царя, да стремглав пропят будет, чтобы христиане знали крест Христов един. Ещеже посем показуя, яко от земли имат востати иная глава, иже вместо Христа прозовеся, приводя ко иной ложной главе, сиречь антихристовой. Ибо и ученицы его повелевают паче Христа веровати. о нихже глаголет святыи Ипполит папа Римский, да и Кирил Иеросалимский. Иже на земли паче всех вознесется, блюдиася. себо есть дух антихристов. Сего ради учащих и наставляющих себе пасущих, и высящихся нечестивых пастырей, чрева ради и домов украшенных, и риз многоценных; а не смиренный образ и целомудренный имущий и неблагодарный, яже бы достойно пастырем быти, и по истинне стадо паствити, якоже предавше Божии апостоли, святии отцы, и сами они божественное свое стадо соблюдше и сохранше, со всяким истинным поучением, непорочны и праведны; и ныне души их в неизреченней радости, на небеси выну прославляют Бога; а на земли в мире сем скоротлимом, телеса их неисповедимая чудодействия содевают, яже нами слышанная и видена быша. Егда Владыка наш истинный Спаситель роду человеку, посылая своя ученики и апостоли на вселенную на утвержение,

глагола им: не нарицайтесь учителя, ниже наставницы. Един бо есть наставник и учитель. И паки рече: востанут бо лжехристи, и лжепророцы, и дадут знаменья велия. аще мощно прельстят и избранныя. Зрим ныне братие о том обуревании и гонении яже на соборную церковь Божию, и на истинную христианскую веру. И глаголет преподобный отец наш Ефрем Сирий [слово 110(105?)]. Не весте ли братие яко на самой громаде злобы стоим, и время люто есть, и близ есть соперника нашего антихристово слава. егоже виде Богослов восходяща зверя из моря, имуща глав семь, рогов десять, на рогах десять венцов, и на главах его имена хульная. И паки видех ин зверь помощник последнему антихристу, восходящ из земли, имея два рога подобна агничим, сей по образу Иоанна Крестителя, егоже нарече Богослов за сокровенное в нем, перваго ради благочестия. При сем предотечи антихристове, дан есть дух образу зверину, перваго зверя, да проглаголет икона зверина. и иже кто не поклоняется иконе перваго зверя. то от втораго зверя предотечи смертию да умрет. Венцы же велии антихристу они пружи, иже лица человеки, власы женски, крыла орли, хобот змиев, во ошибех их главы аспидовы, а жала их яко жала скорпии. Сии пружи духовнии поядают хлеб словесный вечнаго Живота. носят же лице человеческое, иже есть места апостольская, но не нрав. обличают их власы женския. Сии бо сего суть гордаго века сладостнаго сынове. А не будущаго смиреннаго века. Но аще и простроша яко хобот учение, и летают взимаяся книгами, над сынами противления, в погибающих подобных дровам, и сему и стеблию, истязаша во области своей, яко во ошибах главы аспидныя, священников любящих лжю их. чтоже суть имена на главах антихристовых, хулы губящих вся и прельщая, в хуление Богу, хулити имя Его пресвятое воплощение есть скиния Божия, и вселение Его пресвятыя Богородицы, и покой Его иже есть Божиих раб святых. ибо призывает Сион Христос Бог, Иеросалиме Иеросалиме духовный, хошу ты собрати и избавити лова, яко кокош птенца под криле, а кто не похощет, се оставляю вам дом ваш пуст. будет же глаголет Господь последняя леть горши первыя. Еще же глаголет от Марка: Иже бо аще соблазнит единою от малых сих верующих в Мя, добрее ему паче, аще обложен камень жерновный на выю его. и ввержен будет в море. понеже таинство беззакония имать быти, глаголет апостол, яко на сие нечестие от древле предустановленных, иже благодать и тайну великаго Бога и Спаса нашего Иисуса Христа, прелагают во скверну, искупльшаго их Владыки кровию своею отметаються. и кратко речем, от них же бы имела церковь Божия озиратися светом проповеди евангельскаго учения и святых апостол, и отцов проповеди и утверждение, всегда бы непреложно и непревратно и сохранно. А ныне наипаче же от сих тма и прельсть и мрак и соблазн и скверны возниче, яко от адовых сокровищ, мраковидный дух. И ум их омрачися на святую соборную церковь, и на истинную христианскую веру, дунув усты их, и омрачися от поучения и утверждения их. не токмо простая люди христианскаго рода, но и ученыя люди, наипаче же избранныя Божия, ово ласканием и учением, наипаче же томлением и смертию претящая. О, братие, поразумеем злохитрию их и прельщениюю. О слепоты, оле лсты, о дерзости и безумия, о падения злаго, оле прелести и погибеди, толик имущ облежаш нас облак свидетелей. Богу вопиошу не токмо пророки в церкви к нам, но и апостолы. но и сам Спас провозвести на вселенную волны грядущия. Аз же козлище погибшее, яко аспид глухий душевныя уши затыкаю, света истиннаго не зрю, отлагаю солнца правды. Того ради от еретическия зимы озябаю, но да не прельстимся и не предадимся повелению и поучению их смерти душевней. Вся же сия быша и будет по поущению благаго Бога на всю вселенную. занеже умножися беззаконие сына погибельнаго и отступника антихриста. И ныне повсюду яве есть, и видится по всем градом, и во всяком месте в церквах Божиих, и внутрь олтарей святых таин лежит мерзость запустение, имеющ во дни сия, образ сивцев [Изображен двучастный равносторонний крест в круге и подп. Исъ Хъ ника].

Ужас бо и страх вельми содержит мя возлюбленная братия. кто ли не восплачется, видя таковую мерзость запустение. како спасено имя Иисус Христос, внутрь мертвого трупа положиша окаяннии лестыцы. сим хотят погасити, яко свещу семя веры верных. от истинныя главы Христа, ко оной ложной главе антихристу всех привлещи. и свести во дно адово в несповедимыя муки.

[Ниже: Изображено две кругловидные печати с крестами: четырехчастным и двучастным. Под четырехчастным писано:] Зрим ныне братие умершаго крестом Христовым. поверженный в подножии у честнаго и животворящаго креста сего. [Под двучастным:] Паки на кончину оживе глаголема я ника, еже есть победа истинныя христианския веры.

Якоже древле изначала вниде завистником во змию, и прельсти змия Евву иногда, и победив и поругася прадеду нашему Адаму. И изгнану бывшу из неизреченныя славы рая. И у рая бывшу пламенному оружию твердо хранящу врата, и не дающу никому внити вонь. И от того времени яже от Адама вси праведнии праотцы и пророцы, иже богоугодно живущии мужие и жены, вхождение их было во ад, адова же врата входящих пространно приемлющи, а исходящих тверде основана, и укреплена врата медная, а верей железныя, и прочее книги тому свидетельствуют. Егда же Господь наш Иисус Христос истинный Бог наш плотию своею распяся на кресте истиннем, и животворящую кровь источи ис телеси своего. и от того времени даде нам грешным пресвятую плоть, и спасеную кровь, еже есть Агнец Божий вземляй всего мира грехи, тем животворящим крестом, и тем же честным крестом по востании своем еже из мертвых, разруши всеильное хранение адское, яже верей железныя, и врата медныя сокруши, и до основания разлома, и всем адом потрясе, и вся яже быша в нем изведе из него праведныя своя, яже угодившая Ему ветхаго закона. И тем же животворящим крестом своим, отверзе врата царствия своего, и пламенное хранение само отступило от врат, не смея взирати на животворящий крест Христов, и не имать силу ктому врат хранити. Но о сем братие поразумеем и помыслим, силу и величество креста Христова. Также и ныне окаянная победа, сиречь сатана вниде в человеки лукавыя, и сказуют нам тму вместо света, а свет нарицают тмою. забыв реченное пророком: Горе глаголющим сладкое горко, а горкое сладко. Ибо и архангел Михаил егда пряхшеся со диаволом, о Моисеове телеси, не смея суда хулна навести, но рече, да запретит тебе Господь. Сии же звезды прелестныя, и облацы безводнии от ветров преносимыя, якоже животнии по естеству, не ведят яже, хулят. осквернившии дух благодатный, имже тмы мрак вовеки блюдется, и титин показывает, по Ипполитову, и по Богослову, 666. И кратко реши, откуда Христос, оттуду и антихрист; откуда благочестие, оттуду и нечестие. Ребро же северово, аще и хвалится и тщится разорити град Христа великаго Царя Спасителя нашего. но в тяжестех его Бог наипаче знаем есть, ибо по тысящном лете Божия воплощения, развязан бысть сатана.